



US-i China dang Iran-i Strait of Hormuz
shibangba anendaktsütsü ashi

Manipur tsür Linthoi-i Berlin Junior
European Cup 2025 nung gold angu

Manipur nung COVID-19 cases tasen 13, active cases 158 lir

Imphal, Aami/June 23 (Agencies): Manipur nung samples 13 positive ta jangjaba sülen iba state nung COVID-19 positive cases 158 kumogo aser Hombarnü tashinung positivity rate 31.7 lir.

Tang Manipur nung COVID-19 active cases 138 lir. Hombarnü ketdangsür temi samples 41 tendanga liasü. Imphal West nung samples 29 tendangba nungi toku positive liasü. Imphal East nung samples tenet tendangba nungi pezü dak COVID ya putet.

Osang ajanga ashiba agi, June 1, 2025 nü nungi COVID-19 sashia akumba sülen ketdangsür temi samples 510 tendangogo aser cumulative cases 158 puteta liasü. Hombarnü tashinung mozüki nungi shiranger 27 taneptsü ngur yokogo.

Cases 130 home isolation nung lir, cases pongu mozüki nung anogo tenet munger tesüiba

ghonda 24 tsüngta yokogo. Home isolation nung nisung 147 lir.

COVID-19 poktetba sülen Manipur nung iba tashidak agi meneper tang tashinung 1,40,198 alitsü, mozüki nungi 1,37,911 yokogo aser iba virus dak sendakba nung asü-amaba 2,149 alitsü.

Tang iba tashidak tali akumba sülen State Health Director Chambo Gonmei-i nüburtem dang tsüboa malitsü, saka sorkari sangdongba SOPs sülen anidaktsü ayongzüka liasü.

Sorkari June 12, 2025 nü team leaders aser züngsemtem densema committee balala tentetshiba sangdong agütsüogo, ta paisa ashi.

Manipur state sorkari June 21, 2025 nü ano memorandum ka agütsü aser team leaders aser züngsem ajunga dang tang aliba guidelines nung shia aliba ama nüngdakba mera agütsü totuyuba agütsü.

Nagaland nung arem tasazük 354 sq km samaogo

Dimapur, Aami/June 23 (TYO): Project Lead Wildlife Conservation Society- India, Bano Haralu-i ashiba agi, 2002 nungi 2024 tsüngta Nagaland nung primary forest tasazük 354 sq km aser süngdong agi meyibanga aliba tasazük 2,680 sq km samaogo.

Kohima Press Club ajanga Silviculture Division Kohima den lungjemer June 21, 2025 nü Botanical Garden Kohima nung "Community Biodiversity & Wildlife Conservation" indang workshop ka ayongzüka nung lai iba o ya ashi.

State nung arem samaba ya talisa nüburtemi wazüka ayuba arem tem tesem balala nung aliba, timba nung tesendaktep maliba aser ozü aser arem shiruru shikariba ajanga lir ta ashi.

Haralu ya Wildlife Conservation Society-India's Nagaland-Conservation and Livelihoods initiative nung program manager lir.

Arem wazüka ayutsü awareness maliba aser alima tzü mopung indang nung lisopur shisatsü maliba ajanga Nagaland nung primary forest samaa aor, ta lai ashi.

"Asen state nung libajen wazüka ayutsü atema temulung magütsür aser aluyimer aser nüburtem takum alitsü asoshi temelen magütsüteter," ta Haralu-i ashi.

Tzü agi ali pongzüka aoba, arem jidokba aser monocropping yimya amshiba ajanga state nung libajen asoshi timtem arutsü tejangja lir, ta lai ashi.

Osangbener temi asen libajen, takum sangnu aser libaliru indang nüburtem nem angatetdakttsüsüla, ta ashi.

State nung nütsüng yongsük ya 2026 tashinung 22.91 lakhs ajungtsü takzüa lir, koba 2011 census nungi shilem 15.79 renlokba alitsü, aser arem wazüka ayutsü asoshi temulungjangji nüburtem lir, ta lai ashi.

Lai osangbener dang nüburtem nung Community Conserved Areas tuluba kumdaktsütsü aser itemji kanga junga mekazüka yua lanur lenirtem nem itemi mita aser kumzüka ayuba nung shilem agidaktsütsü asoshi angatetdakttsütsü ayongzüka liasü.

Gwasinlo Thong, Member Indigenous People & Local Communities (IP&LC) Advisory Board, WCS-International, & Chairman Sendenyu Community Biodiversity & Wildlife Conservation Board ajanga 'Community Biodiversity & Wildlife Conservation' onük nung jembidang, otsüla-oboula nunger akhu mapang nature den lirumedema kati ka yaritepa aliba indang jembia liasü.

Pai Naga nunger ajunga dang Article 371 A ya kumzüka ayutsü ayongzüka aser iba article ya agienra, asenok takum aliba temeden, sobaliba, puti otsü aser libaliru ajunga lendongi aitsü, aser Article 371 ya terenlok asoshi tetsükdaktsü ama bilemra, itemji tamachi ama züngshitsüla, ta ashi.

Thong-i "Sendenyu Community Biodiversity and Wildlife Conservation Reserve" indang PowerPoint ajanga lemsatepa liasü aser küm 25 tashi anepalua aruba aser state nung Sendenyu Community Conserve Area ya mezüngbuba Biodiversity Education Centre akumba aser 2016 küm Balipara Foundation Award anguba indang lemsatepa liasü.

Nagaland nung 2025 tashinung TB samadaktsütsü pangjemshi



Pradhan Mantri TB Mukh Bharat Abhiyan atema Raj Bhavan, Kohima nung June 23, 2025 nü senden ka amendang tangokba noksa ka nung Nagaland Ang La Ganesan den tongtipang nisungtem aser Department of Health & Family Welfare nungi ketdangsürtem angur.

Dimapur, Aami/June 23 (TYO): Nagaland Angh La Ganesan-i Pradhan Mantri TB Mukh Bharat Abhiyan inyakyim reprangshimtsü asoshi Department of Health and Family Welfare nungi ketdangsürtem den senden ka June 23, 2025 nü Raj Bhavan, Kohima nung senden ka mena liasü.

Iba senden ya state nung TB samadaktsütsüba sentongtem inyakba nung renloka aoba asadangtsü asoshi mena liasü.

Department inyakyim asoshi Angh-i tenüngsang agütsüba mapang awareness prokshitsü aser TB dak sendakba angatetdakttsütsü asoshi tamangba yimsü lenirtem nem mapa nungloktsütsü tongtipang lir ta ashi.

Paisa kija, lokti aser institution balala dang yakbangi arua TB agi shiranger nem chiyongtsü aser teyari balala agütsütsü asoshi Nikshay Mitras (donors) ama tenüng zülüoka yariteptsü aser TB agi shiranger tajungba nung anepalutsü ayongzüka liasü.

Iba senden nung Minister, Health and Family Welfare, Paiwang Konyak-i Angh dang tuberculosis anema raraba nung department tasa, takok aser

timtem ajurubatem lemsatepa liasü.

TB agi shirangertem jangjatetba nung tashi itshiba, treatment tajungba nung agütsüba aser talisa meta talang nung aser tashidak agi mela-mela meneptsüsa aliba nüburtem nem awareness agütsüba indang pai ashi.

Angh-i temulung agüja yariba aser lenmang sayuba ajanga state nung TB Mukh Bharat Abhiyan kübok nükjidong tongtetsü imlar, ta Minister Paiwang Konyak-i ashi.

Commissioner & Secretary, Health and Family Welfare, Anoop Khinchi-ia TB nungi jenbua alitsü, kera putettsü aser shiranger yaritsü asoshi department-i tang teinyakdak sentongtem indang lemsatepa liasü.

Pai jembidang sector balala tsüngta amalitep akatsü aser nüburtem shilem agidaktsütsü tongtipang lir aser TB samadaktsütsü asoshi national framework den lirumedema department-i inyaktsü meranger, ta ashi.

Iba senden nung Nagaland Chief Secretary tenüng nung Principal Secretary, Law &

Justice and Fisheries & Aquatic Resources, Y. Kikheto Sema dena liasü aser paia awareness tali agütsütsü aser nübur timba nem shilem agidaktsütsü nüngdakba lemsatepa liasü.

Osang-tsüsang prokshiba nung arogo aser tamangba yimsü nung amendaka aliba lokti tentet balalai tongti shilem agitetsüba indang pai lemsatep aser grassroots level nung yimya melenshitsüba ajungshia liasü.

State nung 2025 tashinung TB samadaktsütsü asoshi iba tashidak tali putettsü aser mapang shidak nung anepalutsü asoshi nükjidong yur Nagaland nung district ajunga nung special health camp tem alitsüla ta pai ashi.

Department nungi ketdangsür temi state nung TB prevalence indang data tejangja rasaa ashi aser National TB Elimination Programme kübok outreach activities, diagnostic services, treatment adherence aser community health workers temi inyakba indang osang agüja liasü.

Nagaland ya 2025 tashinung TB-free state ka kumdaktsütsü asoshi stakeholders ajungai asendenshir külemi inyaktsü pangjema iba senden tembanga liasü.

BLO Supervisors 379 atema New Delhi nung training tenzüko

Dimapur, Aami/June 23 (TYO): Booth Level Officers (BLO) Supervisors batch 13 buba training tanü International Institute of Democracy and Election Management (IIDEM), New Delhi nung tenzüko.

Chief Election Commissioner (CEC) of India, Gyanesh Kumar-i iba sentong tenzüka shilem agir 379 (Uttar Pradesh nungi 111, Madhya Pradesh nungi 128, Nagaland nungi 67, Meghalaya nungi 66 aser Chandigarh nungi tenet) den jembia liasü.

Tesüiba ita asem tsüngta Election Commission of India ajanga New Delhi nung BLO/ BLO Supervisors 5,000 dak tema nem training agüja liasü.

CEC Gyanesh Kumar-i iba sentong nung jembidang, Representation of People Act 1950, 1951, Registration of

Electors Rules 1960, Conduct of Election Rules, 1961 aser mapang shia ECI ajanga totuyuba agütsüba ama electoral rolls renemtsü aser elections shidak agütsü mechi item training sentongtem ayongzüker, ta ashi.

Democracy kecha nunga ozüng dang tasüngtetba kecha mali aser India nung elections ya ozüng nung aliba ama agir, ta pai ashi.

Training agiba ajanga RP Act 1950 indang Section 24(a) kübok DM/District Collector/Executive Magistrate aser Section 24(b) kübok State/UT indang Chief Electoral Officer (CEO) ajanga adoktsüba final electoral rolls anema mezüngbuba aser tanabuba appeals indang tali jangjar, ta CEC ajanga ashi aser BLOs aser BLO Supervisors tem dang parnok field level

verification mapang electors nem item ozüng angatetdakttsütsü ajungshia liasü.

January 6-10, 2025 nung Special Summary Revision (SSR) exercise renemba sülen Meghalaya, Nagaland, Madhya Pradesh, Chandigarh aser Uttar Pradesh nungi appeals kata agüja mali.

Iba training ya shilem agirtemi voter registration, form ketdangsüba aser electoral procedures tem field-level nung mapa kuma inyakba indang tejangjaba nung angatetdakttsütsüsa renema lir.

Training agir nem IT tools amshiyim indang practical training agütsütsü. Iba den ketdangsür nem EVMs aser VVPATs aser mock polls indang technical demonstrations aser training agütsütsü.

Mokokchung nung DTFI senden menogo



DC Mokokchung, Ajit Kumar Verma lenisüba nung DTFI senden amenba noksa nung angur.

Dimapur, Aami/June 23 (TYO): District Task Force on Immunization (DTFI) senden June 23 nü Mokokchung Deputy Commissioner indang Conference Room nung menogo. Iba senden ya Deputy Commissioner, Mokokchung, Ajit Kumar Verma, IAS lenisüba nung agia liasü.

Senden tenzüka mendenbubai züngsemtem ajak pelashishia agizüka liasü. Pai, public health atema maparen balala benoka inyakba mapang lokti-i shilem agitsü koda

tongtibang iba indang lemsatepba den, ken o dak sendaka alir ajak dang district nung health tsüsü inyakyimtem takok ngua aotsü atema longjemer inyaksü mepeshia liasü.

Senden nung DPO RCH & UIP Dr. Linanaro-i, immunization nükjiongji beneficiaries ajak nem vaccine agütsütsü aser ka danga sentoka meyutsütsü atema lir, ta ashi. Laisa, tang benoka inyaka aliba STOP Diarrhoea campaign indang metetdaksü, koba June aser July ita benoka inyaksü, ta

ashi. Maneni lai iba campaing nung sendaka aliba department ajak indang shilem aser khuret indang lemsatepa liasü.

DTFI indang Status Report aser district nung maparen balala benoka inyakba aser takoktem indang Dr. Mero, RRT (WHO)-i metetdaksü.

Senden nungsa awareness aser tasa balala benoksü atema DTFI-i tetsükdaksü ajangshibatem aser item tetsükdaksütem ya koktettsü atema onüktem benoka sensaksema liasü.

SSHP nung adenba kaketshirtem meyipa aruogo

Dimapur, Aami/June 23 (TYO): Ruzhukhire Govt. Higher Secondary School nungi Shethilu Medeo, Chumoukedima Government Higher Secondary School nungi Iris Zomawii Lushai, JNV nungi Inspire Manak Award student- Faragdul Islam aser Holy Cross High School nungi Zatan nunger Samagra Shiksha Nagaland kübok Japan nung oa anogo tenet tashi Sakura Science High School program (SSHP) nung adenba sülen June 22 nü Nagaland-i meyipa aruogo.

Kaketshirtem ya Ministry of Education (MoE) GoI aser Samagra Shiksha/NBSE Nagaland nati latetja aliba arrla dak ajemdaker shima liasü.

Kaketshirtem tonga aruba sülen osangbenertem den sensaksemba mapang kaketshirtem ajaki tajangshiba tajung anguba lemsatepba den Department of School Education aser talisa Samagra Shiksha Abhiyan dang Sakura Science Exchange program nung shilem agitsü atema maongka agütsüba atema kanga pelaba lemsatepa liasü.

Kaketshirtemi ashiba agi, anogo 7 sentong agiba mapang anogo 5 bo parnok sentong balala nung shilem agi aser anogo ana linük sema senzüa liasü. Kaketshirtem ajaki Japan nung tajangshibatem

indang lemsatep, koba parnoki ashiba agi, jangrademtsüka, tebor tajung liasü. Japan semdangba mapang parnoki parnok sobaliba, science and technology amshiba, merekmeju aser yimya awashi tajung beshiba indang angazüka liasü.

Kaketshirtemi ashiba agi, parnok indang technology ji India dang nungi khenyongi balaka aser merekmejuba ngua parnok ya tarutsü lima ka nung alir ama bilemdaksü.

Parnoki ashiba agi, Omika High School kaketshirtem den parnok sensak asemstü atema maongka angu aser iba mapang parnok indang education system indang angazüka liasü.

Parnok rongnung kaketshir ka shibai Japan oshi jembir lai ashiba agi, la tanur asüadang nungi Japan oshi angazüka arua liasü. Lai iba oshi angazüksü jangraba ajanga lai lasasa Japan oshi angazük aser Japan-i aotsü la nükjiong liasü, aser tarutsü nung la Japan-i aotsü maongka ngura iba mapang tetsüdkaksü kecha majangshitsü atema lai iba jenjang agia ata.

Kasa mapang nung Government Higher Secondary School, Chumoukedima Principal Karen Yepthomi-i, Department of School Education aser talisa Samagra Shiksha Abhiyan dang kanga pelaba

lemsatep. Lai ashiba agi, tang agi tanabuba batch Japan-i yokogo koba kaketshirtem pungmang atalokba ka liasü.

Laisa, Commissioner, Keno aser taoba Samagra Mission Director Tamsunaro Aier na danga kanga pelaba lemsatep, kechiyong lai teyari agütsüba ajanga kaketshirtem passport ita ka tsüngda renem kechiyong tanurtem ka ket nung danga passport maliasü.

INSPIRE MANAK AWARDS atema Nodal officer, SCERT Daniel Thong-i ashiba agi, tang mezügbuba sorkar school nungi tanurtem Sakura Exchange program ajanga Japan-i otetogo aser JNV nungi Faragdul Islam aser Holy Cross High School nungi Zatan na national level nung tetoktepba nung shilem agir liasü.

Kaketshirtem ya merit dak ajemdaker shim. Parnok rongnung kati New Delhi nung project competition ka akok aser ka national level tenüng nung shilem agitsü shim. Tebur chanu ana yagi idea tajung bener aru aser national level nung kanga junga shilem agi, iba yongji tena Sakura Exchange program atema shim.

Paisa, tetsürla ana yagia state tenüng nung shilem tajung agiogo, koba parnok mulung nung mapang talangka alitsü, ta ashi.



Sub-divisional Officer (Civil) Tuli, Nagaland & Additional Charge, SDO (Civil) Changtongya, Nukshimatong (NCS)-i Changtongya jila nung June 23 nü Dharti Aaba Janbhagidari Abhiyan indang National Awareness and Benefit Saturation Camp amenoktsüogo. Iba camp yagi Unger, Changtongya aser Yaongyimsem yimtsüng ayimjema liasü.

Seithekema nung awareness camp den repsema saturation camp agiogo

Dimapur, Aami/June 23 (TYO): Ministry of Tribal Affairs (TRI & Media Division), GoI-i tuyuba aser Dharti Aaba- Janjatiya Gram Utkarsh Abhiyaan nung shilem ka ama Chumoukedima district kübok Seithekema Block nung awareness den repsema saturation camp agiogo. Iba camp ya officer in charge, Er. Seyiekhrietuo Solo, EAC, Seithekema lenisüba nung June 20 nü agia liasü.

Sentong nung o jembiba mapang SDO(C), Chumoukedima, Chumben Murry-i, DAJGUA ya India sorkar indang flagship campaign sentong ka lir, koba sorkar scheme ajak atema temsüa alirtem nem tangazükba agütsü aser tajangzü agidaksütsü atema benokba lir. Talisa iba sentong ya lenla ajak nung terenlok atema tribal tem aliba tesem nung benoka inyaker.

Paisa, line department aser lokti shilem kasa dang tongtibang lir aser line department mapaji temsü aliba beneficiary tem nem scheme aser tajangzü indang metetdaksütsüba aser parnok züngoksemdaksütsü atema lir. Kasaji lokti tentet balalai iba camp indang tajangzü agitsü atema pei lokti ayongdentsü asoshi lir, ta ashi.

Paisa, line department aser nüburtem dang longjemer inyaksü ayongzü aser longjemer inyakra iba sentong ya district ajak nung takok asütsü, ta ashi. Maneni pai iba sentong ayongzüka agiba atema EAC, HQ, Seithekema nem tenünsang agütsü aser beneficiary temi iba camp ayongzüka agiba maongka agitsü imlaba lemsatepa liasü.

Sentong nung Er. Seyiekhrietuo Solo, EAC-i, ketdangsürtem department balala nungi officer tem, chairman, VDB authorities aser nüburtem dang sentong nung shilem agiba atema pelaba lemsatep.

Paisa, beneficiary tem atema stall balala lapoka lir ta shia, yimtsüng ketdangsürtem dang tajangzü balala agitsü atema yimdaklirtem nem teyari agütsütsü mepeshia liasü. Paisa, nüburtem dang iba maongka ya service balala agitsüba atema dang masü saka department-i schemes balala agütsübatem aser item scheme tem ajanga tarutsü nung tajangzü agütsütsü alibatem indang tali tajungba jangjatsü atema lir, ta ashi.

Seithekema administrative block kübok Thilixu; Kirha; Chekiye; Diphupar B; Sovima; Naga United; Sodzulhou; kozabe (7th Mile); Tenyiphe II; New Seithekema; Seithekema C; Tsethrongse; Bade; Diezephe; Murise; Vidima yimtsüngtem lir.

Camp mapang AADHAR Camp; PMMVY; IGNOAPS; Widow Pension; Ayushman - CMHIS; Mission Indradhanush; PM Jan Dhan Yojana; MGNREGA; CMLIS Registration; CMMFI; PM-Kisan; Ration Card (NFSA); PMSBY; PMJJBY; TB Mukh Bharat; Mudra Yojana; PM Vishwakarma indang metetdaksa liasü.

Sentong tatemü nüburtemi parnok nem service balala agütsüba agia parnok indang kuli kakat den passport size photographs, Birth certificate, Residential proof, aser Bank passbook nunger benoka liasü.

Shamator yimtsüng nung Dharti Aaba Janbhagidari Abhiyan sentong ayongzüka agi



Dimapur, Aami/June 23 (TYO): District Administration aser District Hub for Empowerment of Women (DHEW)-BBBP nati ayongzüka tang agia aliba 'Dharti Aaba Janbhagidari Abhiyan' sentong June 23 nü Shamator yimtsüng nung agiogo. Iba sentong ya CDPO Shamator lenisüba nung agia liasü.

Iba awareness campaign ya tetsürtem safety & security schemes dak sendakba nung agi, aser iba den PMMVY (Pradhan Mantri Matru Vandana Yojana) registration drive ka aser sanitary pads lemstüba sentong dena agia liasü.

Sentong nung tetsürtem nem parnok teküzmükba kübok alitsü atema sorkar scheme balala benoker aliba indang metetdaksü. Sentong nungsa temsüa aliba beneficiary tem PMMVY scheme nung züngoksem, mashisa aliba aser mama yongdakja aliba tetsütem nem senotsü teyari agütsü.

Maneni tetsürtem menstrual hygiene aser health ajungkettsü atema sanitary pad tem lemja liasü.

Kasa mapang nung Dharti Aaba Janbhagidari Abhiyan sentong nung shilem ka ama June 22 nü Shamator district kübok Yakor yimtsüng nung tetsürtem safety & security scheme tem dak sendakba nung tangazükba agütsüba den Pradhan Mantri Matru Vandana Yojana (PMMVY) registration drive ka agi aser menstrual hygiene ajungkettsü atema sanitary pad tem lemja liasü.

Maneni sentong agiba tesem nung mashisa aliba aser mama yongdakja aliba tetsütem nem teyari agütsütsü asoshi helpdesk ka amenok aser district hub for empowerment of women-i Women Safety and Security Schemes-cum-PMMVY Registration Drive aser Sanitary Pads Distribution Outreach Activity dak sendakba nung awareness campaign ka ayongzüka liasü.



June 23, 2025 nü New Delhi nung BJP lenirtem- Maneka Gandhi aser Varun Gandhi nati Sanjay Gandhi asüba anogomong nung pa leper semdanga akhüm agütsüba noksa nung angur.

Israel nungi tang mezüing India nunger 160 anir aruogo

New Delhi, Aami/June 23 (Agencies): Tang Israel nunger airspace shibanga aliba den külemi commercial tayimtsü service ajak anena lia Israel aser Jordan na nung Indian missions-i yaritepa tang mezüing Operation Sindhu kübok Israel nungi India nunger 160 Delhi tonga anir aruogo, ta Indian embassy-i metetdaksü.

Tang Israel aser Iran na tsüingda raraba ajanga tensa tamajungba küma Israel nung alir India nungertem-a aikati tetsübu India-i meyipa aruner.

Israel nungi aniteta Israel arrtsü adena India nunger 160 Jordan-i anir oa liasü aser Hombarnü tayimtsü ajanga India tonga anir aruogo.

Amman nung aliba Indian embassy-i parnok tanenzükdak renemja liasü.

Hombarnüa Israel nungi India nunger telok ana- telok ka nung nisung 175 aser telok ka nung nisung 268 Israel arrtsü adena Jordan aser Egypt nati anir ogo.

Tesüiba anogo ana tsüingda Israel nungi India nunger ajak agi parnok 605 anitetogo.

Hombarnü Israel nunger arrtsü adena anir aoba India nunger 443 ji Jordan aser Egypt na nungi tayimtsü kaka ajanga India-i anir arutsü.

Tayimtsüji Ministry of External Affairs aser Jodan o Egypt na nung aliba Indian missions-i achaayangtsütsü.

Middle East nung tensa tamajungba akümba sülen taoba hopta India sorkari sensotem anir arutsü atema Operation Sindhu tenzüka liasü. Iran nungibo India nunger aika anir

aruogo, aser Hombar nungi tenzüka Israel nungia anir arur.

Israel-Iran rara ajanga tensa tamajungba akümba nung ajemdaker taoba hopta Tel Aviv nung aliba Indian embassy-i 24/ 7 control room amenoka liasü.

Iran yimtiba Tehran aser Israel yimtiba Tel Aviv naprongla nung amenoka aliba Indian Embassy-i India nunger sensotem yaria Armenia, Jordan aser Egypt linüktemi anir aoer. India nungertemji Israel aser Iran arrtsülen adena anir aoba sülen India sorkari achaayangtsüba tayimtsü ajanga India tonga anir arur.

Tang Israel nung India nunger 40,000 dak tali lir. India nungertemji kar healthworkers, kar kisüjensü mapa inyaktertem, mapa balala nung mongintem aser kaketshirtem lir.

Middle East tensa ajanga totzü supply merakstatsü: Hardeep Puri

New Delhi, Aami/June 23 (Agencies): Tang Israel aser Iran na tsüingda rara ajanga Middle East nung tensa mejungi lia US-ia Iran nung nuclear facilities amakba ajanga ano tensa tamajungba kümogo.

Middle East nung tensa tamajungba akümba ajanga totzü supply agütsüba tsütsü tetsükdaksü adoka India nung totzü agi anüingtsü, ta aikati tsüibua bilemba mapang ka nung Petroleum & Natural Gas Minister, Hardeep Singh Puri-i, Middle East tensa ajanga India nung totzü agi manüingtsü, ta metetdaksüogo.

Minister-i, "Tesüiba hopta ana tashi onoki Middle East nung tensa mita dang arudar. Ato kilonser Narendra Modi

lenisüba kübok tesüiba küm ishika tsüingda onoki supplies inyakyim tajungba kümdaktsüogo aser tangbo asenok indang supplies teimbaka Strait of Hormuz ajanga arur masü," ta metetdaksü.

Paisa, linük nung totzü marketing companies (Indian Oil, Bharat Petroleum aser Hindustan Petroleum) ket nung hopta aika atema totzü rizünga lir aser maneni lenmang balala ajanga energy supplies angutsü, ta metetdaksü.

"Sensotem nem totzü supply shidak agütsütsü atema onoki telemtetba agia inyaktsü," ta union minister-isa metetdaksü.

Pudur nung totzü 2.25 million metric tonnes (MMT) rizünga lir, Visakhapatnam facility nung

totzü tazü 1.33 MMT lir aser Mangalore nung 1.5 MMT lir, ta paisa metetdaksü.

Iran linük ya Strait of Hormuz/Persian Gulf indang north tsütsülen lir. Iba tzü lenmang ajanga anogo shia Saudi Arabia aser UAE ama totzü adokdaktsüba linüktem nungi totzü barrel million 20 abener.

Tamalen Iran-i, Israel aser Iran tsüingda rara nung US-i shilem agira Iran-i Strait of Hormuz lenmang ya nokdangtsü, ta amokmerena liasü.

Middle East nung rara ano tuluba kümra Saudi Arabia, Iraq, Kuwait aser UAE nungi totzü supply asüba tsütsü timtem adoktsü aser totzü jenjang kanga atutsü, ta aikati bilemer.

By election: AAP-i menden ana, BJP, UDF aser TMC-i kaka nung takok angu

New Delhi, Aami/June 23 (Agencies): Tawa state pezü nung assembly menden pongu atema by election agiba osang Hombarnü sangdongogo; AAP-i menden ana nung takok angu, BJP-i menden ka, UDF-i menden ka aser TMC-ia menden ka nung takok nguogo.

Gujarat nung BJP-i Kadi assembly menden nung takok angu aser Visavadar assembly menden nung AAP candidate-i takok angu.

Kerala kübok Nilambur menden nung UDF-i takok angu, Kaliganj menden nung TMC-i takok angu aser Punjab kübok Ludhiana West assembly menden nung AAP-i takok nguogo.

Hombarnep 8:00 ako nungi vote azüing tenzüka liasü.

June 19 nü Gujarat nung menden ana- Visavadar aser Kadi; Punjab (Ludhiana West), West Bengal (Kaliganj) aser Kerala (Nilambur) nung by election agia liasü.

State pezüprongla nung tesem kar nung tilateri mangatettep adokba dak

alaka election tesünep nung agiteta liasü.

By election nung tongti party temji Bharatiya Janata Party (BJP), Congress, Aam Aadmi Party (AAP) aser Left Democratic Front (LDF) party tem liasü.

Iba election ya BJP-i aniba National Democratic Alliance (NDA) aser opposition teloktep INDIA naprongla atema kanga tongtimbang election ka liasü.

Gujarat nung Kadi menden, Bengal nung Kaliganj aser Punjab nung Ludhiana West mendentem nung MLA tem süadokba ajanga by election agitsüsa aküm.

Ano Gujarat nung Visavadar MLA aser Kerala nung Nilambur MLA nati pei menden nungi anenba ajanga by election agitsüsa aküm.

Tawa agiba by election nung voters shilem teimtibai vote agütsübaji Nilambur nung liasü (shilem 73.26) aser voters shilem ishikai vote agütsübaji Ludhiana West (shilem 51.33) liasü.

Iran nungi ano India nunger 285 anir aruogo: MEA



June 22, 2025 ayaterm nung Operation Sindhu kübok Iran nungi tayimtsü ka ajanga India nungertem Delhi airport tonga arudang Minister of State for External Affairs, Pabitra Margherita-i parnok agizükba noksa nung angur. Amongnü ayaterm nung Iran kübok Mashhad yimti nungi India nunger 285 anir aruogo, aser ibaji densemabo Iran nungi India nunger ajak senteper 1,713 anir aruogo.

New Delhi, June 23 (Agencies): Amongnü ayaterm nung tayimtsü ka ajanga Iran nungi India nunger 285 New Delhi tonga anir aruogo; Delhi airport nung Union Minister of State for External Affairs, Pabitra Margherita-i parnok agizüka liasü.

Operation Sindhu kübok tang tashi nung tayimtsü tibuba nung India nunger anir aruogo aser India nunger ajak senteperbo 1,713 anir aruogo.

MEA-i X ajanga, "India-i Operation Sindhu kübok sensotem maneni anir arudar. Minister of State Pabitra Margherita-i June 22 aonung 11:30 ako nung Mashhad nungi arur India nunger 285 Delhi

airport nung agizüka liasü," ta metetdaksü.

Amongnü aonung Delhi tonga anir arurtem rongnung ka, Fazal Abbas-i, "Ni kanga pelar. Ato kilonser Modi-i nisung ajakji par kibong züngsemtem ama bilemer. Pai Iran nungi onok kümzüka kidangi anir aruogo," ta ashi.

Ano Lucknow nungi SN Zaidi-i, "Onok anir aruba atema ni asen sorkar, Indian Embassy aser Ministry of External Affairs dang pelar," ta metetdaksü.

Amongnüa Masshad yimti nungi India nunger 311 New Delhi tonga anir arua liasü. Iba tayimtsüji nikongdang 4:30 meta Delhi airport tonga arua liasü.

ALI KIMONG AGIADOKTSÜBA SANGDONG

Branch Office : ICICI BANK LTD, BP-4, Technopolis Building, 4th Floor, Sector V, Salt Lake City, Kolkata West Bengal - 700091
CIN No: L65190GJ1994PLC021012, www.icicibank.com

Securitisation, Reconstruction of Financial Assets aser Enforcement of Security Interest Act, 2002 aser kasa ozüing section 13(12), Rule 3 nung shia aliba ama Security Interest (Enforcement) Rules 2002 nung ajemdaker, Authorised ICICI Bank Officer-i yangi tsüinglanglen tenüing agüja aliba sen apurtem nem iba notice nung shia aliba senji iba osang ya ngur anogo 60 tsüingda agütsütsü asoshi iba Demand Notices agütsür.

Iba sentsüji maotetra, sen apur aser nübertem dang yangi tsüinglanglen shia aliba ali kimongtem ya kasa ozüing Section 13(4) nung Rule 8 nung shia aliba ama iba sangdong agütsüri agiadoktsü ta metetdaksür. Anungji, talisa sen apua alir aser nübertemi iba ali rongsen nung teka aser tebang maitsü metetdaksür. Kari danga iba rongsen dak kongshira ICICI Bank Limited-i takangba alitsü.

Sr. No.	Name of the Borrower(s)/ Loan Account Number	Description of Property/ Date of Physical Possession	Date of Demand Notice/ Amount in Demand Notice (Rs)	Name of Branch
1.	Anich Mia/ Aidhan Bibi/ C/o Md Achan Mia Mohanpur, Kamalpur Near I.C.D.S. Center, District Dhalai Tripura Dhalai - 799285/ TBAAA00006503309, LBAAA00006521861	Sabek Dag No. 1397 (part), Hal Dag No. 1467/ 1803, Khatian No. 517, Revenue Circle Kamalpur, Mouza Mohanpur, Mahakuma Kamalpur, Tahasil Kamalpur, District Dhalai, Tripura, Admeasuring An Area Of 08 Satak (3456 Sq. Ft.) North: Dag No. 1468, Occupant Kutub Miyan South: Dag No. 1558, Occupant Govt. Dam And Aidhan Bibi East: Dag No. 1468, Occupant Hussain Miyan West: Dag No. 1464, Occupant Kulsum Bibi/ Date Of Physical 18/06/2025	September 23,2024/ Rs. 28,95,071.14/-	Dhalai (Tripura)/ Kohima

Tekalen shia aliba sen apurtem/guarantors(s) dang anogo 30 tsüingda sentsü aotsü osang ya metetdaksür, sentsüji maotetra mortgaged süa aliba ali kimongtemji iba sangdong adoker anogo 30 sülen Security Interest (Enforcement) Rules 2002 kübok Rules 8 aser 9 nung shia aliba ama ayoktsü.

Date: June 24, 2025, Place: Kohima

Sincerely Authorised Officer, For ICICI Bank Ltd.



TIR YIMYIM YIMOBILEM (EDITORIAL)

DIMAPUR TUESDAY, JUNE (AAMI) 24, 2025

Oshi ajanga mapa anguba

Alima nung jembiba oshitem, kechi oshi südirsüaka, kati ka bilemba ashitsü aser kati ka aginüba aser ashibaji angateta inyaktsü asoshi lir, anungji kin tulu tila ta masü saka oshi yabo ajak asoshi kasasa tongtibang lir, anungji yabo nisung ishikati dang jembiba oshi aser yabo nisung aikati jembiba oshi ta masü saka nisung shia asoshi pei kini jembiba pei tetsü oshiji ajak dang nungi tongtibangtiba oshi lir. Atangji, alima nung ajak kasa masü, kar tashitemeteter kin aser kar tashimemeteter kin, kar kin tulu aser kar tila, anungji tashimemeteter aser kin tila purtemji mapa ajak nung tashitemeteter aser kin tulu sülen anidaktsüsa akümer. Aji oda, tanü asenoki asen tetsü oshi sentoka toktsür English oshiang tesapuba jembiba ama, tangar kintemia pei tetsü oshi dang nungibo English oshiang tangazüknüba aser tejembinüba, kechiyong English yabo alima oshi amai kümogo, anungji English jembitetertembo mapaa melamelaa angur aser alima ajaklen sademsadema senzüteter. Ibaji kodang bilemdangdir, alima nung English oshi ya oshi dang masü saka nisung ka asoshi mapa aser rongsen anguba lenmang tajung ka bushitetba den kasa lir. Iba jagi kasa lima nung kasa nisungsa süaka English mashirtembo metetmeteta maparen aika nung takoksa angur. Kasaji, India nunga Hindi ya linük oshi asünungji, Hindi mashirtembo, talisa, government mapa nung maongka magitet akoksar. Atangji, India nung government-i kaketshirtem asoshi pei pei azüngdak English aser Hindi dang masü saka pei tetsü oshi dena angazüktsü asoshi shisaliok sentong nungbo latetja lir, ajisüaka Nagaland ama nung kin aika pei tetsü oshi kaketreju nung angazüktsüsa renema mali, kechiyong tazüngtsü kakettema peria madokteter aser tesayur shimtsüa makoker, ano kaket adoka alir kintem nungia kaketshir aikati pei tetsü oshi agitsü mejangrar, anungji Naga nunger kaketshirtem rongnung class 10 tashi pei oshi agia azüngba kaketshir aikabo malitsü. Anungji, Naga nunger lanurtem aika pei tetsü oshia mashi aser English-a junga mejembiteteter aser tezülua mezüluteter, ano Hindi-a junga mangateter aser tejembia mejembiteteter ta külena masü, külena masü saka tom nung shingaia memetet akoksadagi. Iba jagi Nagaland nung mazüngertema mapa mangur aser tazüngertema teinyaktsü maka ta nisung ajak mapa meinyak chiyonga kidangmongertem kümogo. Iba ama mapang ka nung, Nagaland nungi yokba Lok sabha tatar Wb.Sü bongmeren Jamiri Postal Services Department nung Grade IV staff shimba maparen nung Nagaland nungia Naga nunger tetsü oshi agia class ter pass ajangatetertembo magir saka English mesüra Hindi agirtem nem dang maongka agütsür, iba jagi Naga nunger pei tetsü oshi tagidak maka kümdaktsür, anungji Postal Services nung Grade IV mapa atema shim dangbo English aser Hindi-ji dang masü saka Nagaland nung jembiba Naga kin shia pei tetsü oshijia agitsüla, iba jagi dang lisopurtem mapa angutsü ta akangbaji kanga dang nüngdak mapa ka reprangteta inyaker asütsü. Post office nung shiti agizüktsü aser lemstsütsü asoshi pei lima nungbo Hindi mesüra English metetba nisung dang agitsü ta asübaji, lisopurtem nem pei tata mapa aser maongka magütsütsü tebilemba nung latetba ama angateter. Iba ama lisopurtemi magitettsüsa inyakyim lateta yutsüba agi, Nagaland nung center government-i reprangba mapa inyakdak Railway, Post office aser BSNL ama nung Grade IV staff rongnung Naga nunger lisopurtem aikabo mangutsü. Itemji asenoki meteta aser memeteti asenok agitsüba tata shilem magiteti tangar nem agidaktsüba mapatem lir. Atangji, itemji yimten nung yimsüsürtemi rajema aser reprangteta jembitsütsüla, saka nübortemia memetet aser yimsüsürtemia merajem ta küm aika asenok meyong maongka magiteti aruogo. Ajisüaka, tang danga Lok sabha tatari reprangteta ola adokba jagi Postal department nung dang masü saka Railway aser tanga central office-tem nunga lisopurtem tangutsü tata shilembo shitak angu tenzüktsü imlar. Atangji, asenok asoshia mapa angubaji tatem masü saka kechi mapa ngudir, iba mapa nungji ochishia aser kanga nendaka inyaktsübaji kanga tongtibang asütsü.

OLEMSABANG

TETSÜR TOBUR TAJUNG TILATEM

~ P.Renthy Jamir

Asenok osang azünger ajak khenbo pelaseta menürema ocet kabo azüngtsüla ta bilemer. Alima ochimashi yimten yimsüsür, arogo tenzüker tashi mait mokominba indangsa azüngba agibo tazünger mepelar. Anungji tazünger ajak khen tango satoka pelashishia azüngtsü iba wawamenü tejen otsü shitak atalokba kar yangi nübur ajak ayongzüka zülur. Ya tongtibang ocet ka masü, shinga aija lutsülura züluba masü. Saka ajaki metetba alima yimya tzü mopungi bentsür aruba lepshir. Nisung ajaki pa/la tobur tajunga ta-ang sünür. Azü chanu, ak chanu ka alitsü jembinunga tobur tajungba tama alitsü rakteper, an-a tobur tajungba-ang metsüloker. Anungji meimchir tobur tajung aser tamajung tetsüngda tebandang tulu ka lir. Saka Lipok nungi asen Aori tobur ajung menaktsü masü ta osütsü süa jembia aru. Iba o ya kar tobur junger

azümesener atema jembia, saka teimba tobur majunger mulung süngzükdaaktsütsü atema jembiba lir. Tang yangi aginüba onükjibo tebur meteni tetsür tobur ajungba indang dang shinür. Kechiyong tobur ajungba ya ajak atema lir, oda tila tanur o junga mashirtemia tobur tajunga ta shira tashi angar, kanga pelar. Tang iba onük yabo item ajak toktsür tetsür ka tobur ajung indang zülur. W.Wordsworth-i tobur tajung oset mesüra taküm kaji teti pela-a alir ta zülü. Ano Aor Jungliyimti lima alidang aiür tobur tajung ka ngua süngdongia-süng ken yamai tenloktsü ta atener.

*Tzüsen jokaer süngsang kongro nedak monger nie,
Jongzü yimtilar Moya temsenaka matsüngzük naya
Na menüremli süngti tzüpen süla rimatem.*

Aor tetyatsü nung tenük saak agi Moya Süpong ka langer ta jembibaji tetsür tobur ajungba jenjang indangsa lir. Sü rongnunga Moya Süpongsa tuluba yamaji tetsür tobur ajung jenjang tulu aser Chubatsür nungi shir lajartsür tashi tobur tajunga ta-ang sünür aser la dang nungi tangar tajungba mesüdaktsünür. Anungji England Chubatsür Queen Elizabeth-i 1580 nung England tsür Shinga Aina (looking glass) mamshitsü ozüng agütsü. Ano yimsüsür aika pei kinungtsü tobur tajunga ta südaktsünüba yong linük rongsen tashionshia corruption tali bena aruba tashia lir. America President Nixoni government fund nungi tebuttsü Mrs Pat nem naro (earring) Dollar 9000 agi alitsüba, ano Saudi Arabia Chubai senpet azük Dollar 52,400 jenjang agütsüba koba White House Gift Unit nung ayutsüba liasü ajia pari agiba corruption aika ajanga The episode betrayed malafide intentions of the First Lady ta corruption agi sünger tebuba mapa nungi anentsüsa akum. Ano Manila Philippine President kinungtsü Imelda Marcos tobur tali jungdaktsütsü süoshi tapu balala 6900 dresses aser tsüngsem jura 1220 tashi yua linük rongsen lalushiponga alibayong tesülen pei lima toktsür bendang limai jena aotsüsa akum. Tebur aika pei kinungtsü nem jang teni nung sentaker anishir ama anishidaktsür, yamaji tebur tetsür nem anishidaktsüba agi alemli tebuba arishi-i aodang tebuttsüi arür majurura süng kua bener adokang ta shir odaktsüba otsü tanü tashi tansütsü jembir. Aor otsü nung tebuttsüi ana alijar netsü kolak tangzüka bener arung asünung hai sür lepzüka bener aruba ana linüra ner chir ya anidokang asünung anidokba yamala matamabensa tebur aika lir. Danish Thatcheri yamai ashi, "I like everything my beloved wife likes if she wants to buy the brick of St Paul Cathedral then I would buy it" kü kinungtsüi kechisa aginür nia aji aginür, lai tenla ki kilem kolak nung tua aliba ita lungji alinüra ni alitsütsü. Tetsür tobur ajungba tebur aginüa meimba, the feeling of beauty ta Radamesi Aida kanga meim ibajagi tebu yimli ashioktsüba, Radames betrayed his fatherland for her ta otsü jembir, azünger. Aor tetyatsü nungsa tetsüi tanur punger lia ner tanur yabo tobur tajunga ta ashinung, "Ano ya tejak memeyitsü ako ta ashiba jembir."

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Syria yimtiba, Damascus nung Tenla kidang nisung 22 pokset



June 22, 2025 nü (Amongnü) Syria yimtiba, Damascus nung aliba Mar Elias Arogo Tenla kidang Islamic State kiralongrar kati pa mang nung bomb alenloker pokdaksüba sülen tangokba noksa nung angur. Iba lendong nung nisung 22 pokset aser nisung 52 yoruogo.

June 23, 2025: Amongnü Syria yimtiba, Damascus nung aiba Mar Elias Arogo Tenla kidang kiralongrar kati pa temang nung bomb alenloker pokdaksüba lendong nung nisung 22 pokset aser aika yiruogo, ta health ketdangsertem aser security ketdangsertemi metetdaksü.

Yaküm December ita nung Islamic telok leniba nung Bashar al-Assad yimsüsüba atsüngdokba sülenbo tang mezüing Damascus nung kiralongrartemi pei mang nung bomb alenloker amaker.

Syria interior ministry-i, Amongnü bomb amshia Tenla ki amaksangji Islamic State züingsem ka liasü, ta metetdaksü. Pa Tenla ki telungi aitba sülen pai injang tama khaloktsü, iba sülen pa mang nung alenloka aliba bomb ji pokdaksü.

Tenla ki amakba tatalokba nungji taküm tenla agüja amaksangji densema nisung anati shilem agia liasü, ta security ketdangsertemi metetdaksü.

Assad-i aniba sorkar laoba

sülen Islamic State teloki Syria nung Tenla ki aiben amaktsü meranga aruogo, ajisüaka tang mezüing parnoki takok ngua makogo.

Health ministry-i ashiba agi, yashi kasa tatalokba nungji nisung 52 yiru.

Bomb apokba sülen Tenla ki telung atem nung azü tokshia aliba aser menden poksar aliba video aika prokshio.

Syria Tir, Ahmed al-Sharaa-i pai linük nung minorities kümzüksü, ta aibelen nangzüka liasü.

Greek Foreign Ministry-i sangdong ka ajanga, "Syria yimtiba, Damascus nung kiralongrartemi bomb amshia Mar Elias Greek Orthodox Church amakbaji onoki sashia aitsür," ta metetdaksüogo.

"Onoki Syria nung ketdangsertem dang aibelenertem anema tangsa inyaktsü aser Khristantem densema nütsüing ajema alirtem kümzüksü atema telemtetba agia inyaktsü akhanger," ta Greek Foreign Ministry-isa metetdaksü.

Syria nung tesüiba küm aika civil war ajanga Khristan nütsüing kanga ajema kümogo, aser tang Islamic telungpur Hay'at Tahrir al-Sham yimsüsüba kübok Khristantem tetsübu nung dang alir.

US aser UK natibo Hay'at Tahrir al-Sham ya kiralongrar organization ka lir ta sangdongogo.

Yaküm Bashar al-Assad-i Tir menden nungi anenba sülen aonung tayimtsü ka nung Russia linüki jena oa liasü. Hay'at Tahrir al-Sham teloki Aleppo yimti agiba mapang nungi tenzüka Khristan aika jena ogo.

Tamalen International Christian Concern (ICC) Tir, Jeff King-i, "Khristantem atema taruba anogotem aser hoptatemji kanga tongtibang asütsü. Küm 2000 jungnüa Khristantem tera yanga aliba linük nung Khristantem atema tarutsü tia mejangjai kümogo," ta metetdakja liasü.

2011 küm Syria nung civil war tenzüka sülen iba linük nung Khristan nütsüing aika ajema kümogo.

London nung Franklin Graham sentong nung nisung 17,000 aden

June 23, 2025: June 21, 2025 aonung London nung sayutsüingir, Franklin Graham-i ayongzüka sentong ka nung nisung 17,000 aden.

London nung aliba ExCel Centre nung nisung 15,000 dang asemer. ExCel Centre telung nung nisung masemba agi nisung aika pei kidangi meyipa ao saka nisung 2,000 bo kima nungi dang asüyonga iba sentong nung aden, ta Billy Graham Evangelistic Association (BGEA)-i metetdaksü.

Honibar aonung agiba sentong ya Franklin Graham indang 'God Loves You Tour' dak sendakba sentong ka liasü. Iba tour kübok pai Glasgow aser Birmingham densema

UK nung aliba yimti aika nung iba sentong agiogo.

Honibar aonung London nung agiba sentong nungji osangtajung kenetertem-Michael W Smith, CeCe Winans aser The Afters-i shilem agia liasü.

Iba sentong nung lanur aika densema nisung noklang aikati Khrista nem taküm bendanga agütsüogo, ta BGEA-isa metetdaksü.

Franklin Graham-i Tsüngrem temeim osang lemsatepba den külemi tang Ukraine aser Middle East nung rara aser China o Taiwan na tsüingda tensa tamajungba akümba atema tebilemstü akaba lemsatepa liasü.

"Küm ana tejaklen ni yangi

London nung sayutsüingia liasü. Armageddon tongbang raratsü atema mapang ana nung ali ama ilongtepdar," ta pai ashi.

"Nisung aikati teimla maka ama bilemer, aser alima tatembangleni arur ama bilemer. Taonung iba sentong nung adenertem-a aikati teimla maka ama bilemer. Alima ya raksatsü asü, ta nai shisadanger. Temelenshi adoktsü atema Tsüngrem Chir Kibuba Yisu Khrista dangi arung," ta Graham-i ashi.

"Laishibai yamai ashir, Tsüngremi alima oda meim nung Pai Pa ajaso chir agütsü, aser shiri Pa dak amangdir masamatsü saka tatem makai alitsü," ta pai ashi.

ANOGO ABEN TSÜNGREM DEN

Lisemma nung Chuba

Alima aser iba tejangraba süitemtsü saka shibai Tsüngremi mulungba inyaker teti alitsü.

I Yohan 2:17.

Tanurtemi lisem ma nung ki tobur junga yanglur pelateper saka ken dang lir raksadoker. Iba jagi shitakba taküm nung shirnoki lisem ki yanglur aji asenok dang tekumdangtsü ashir. Parnoki ghonda ishika dang masu, saka takok ngua inyaker ta bilema senti mapang ajak endoka inyaker. Saka kodang aonung arur, yipru arur aser parnoki yangluba ki ajak raksatsür.

Jenjang akaba taküm yanglutsü aser amongtema aliba mapa inyaktsü asoshi lenmang ka dang lir. Ibaji Khrista Yisu lungma nung angur, aser idaki teti tatem maka jenjangji yanglutsü akok. Tanurtem takok shisatsü agüja mesütetbaji junger, saka parnok teti tatem maka takum asoshi kechi inyaker?

Mapa nung takok ngua nisungtem nungi tenungsang anguba ken atema tepelatsü aser mulungsu lir, saka teti tatem maka taküm asoshi nai kechi inyaker. Nai lisem ma nung chuba ki asur asu mesüra teti alitsüba mapa inyaker?

Kechisa asenok o nung, Yisu Khrista mapa nung, tamang agi inyaker teti alitsü, kechiaser pa yashi, tanü aser teti kasadang.

Khristan kentener telok 'Third Day' küm aika lir tanaben longjemer



June 23, 2025: Khristan kentener telok 'Third Day' tentetba sülen küm 30 ajungba nüngtem nung parnok tanaben longjemer US tesem balala nung yimti 30 nung kentena jajatsü.

Iba telok nung tongti kentener, Mac Powell-i, "Onok Third Day lir aser tesüiba küm 11 tsüingda tang mezüing onok tanaben longjema kenten-a senzütsü," ta metetdaksü.

Third Day küm 30 ajungba nüngtem nung tour ji 2026 küm tenzüksü aser ita asem tsüingda parnoki US nung yimti 30 sema kentena senzütsü. Par telok küm 30 ajungba anniversary tour nungji US. Award-winning artist Zach Williams-ia shilem agitsü.

Third Day nung züingsemtemji- tongti kentener Mac Powell, electric guitar atemer Mark Lee, bass guitar atemer Tai Anderson aser drum atemer David Carr nunger lir.

Kenten sentong shia nungji parnoki 'Third Day' indang nüngtugu kentem- "Your Love Oh Lord," "Consuming Fire," "Nothing At All," aser "My Hope Is You," densema ken aika atentsü.

Third Day telok tentetba mapang nungi tenzüka parnok indang kensep million 10 dak tali yokzükogo, No. 1 singles 31 ajangzüktet aser parnoki studio kensep 14 adokogo.

"Iba sentong ya kenten sentong dangbo masütsü, saka kenten benjung, tamangertem longjemba aser onok sapurtem longjemba mapang ka asütsü," ta Anderson-i ashi.

Osangbener den jembidang Mac Powell-i, "Ozü telok kodang longjemtsü, ta tesüiba küm aika kü dang asüingdanga aruogo, 'Third Day teloki ano kodang kentena senzütsü,' ta asüingdanga aruogo. Onok tanaben longjemer sabang nungi külemi shilem agitsü maongka anguba atema pelar aser yongyar," ta metetdaksü.

Küm 30 ajungba anniversary tour ji sangküm March 26 nungi tenzüksü. Parnoki Alabama, Arizona, California, Florida, Georgia, Illinois, Indiana, Michigan, Minnesota, Missouri, Nevada, North Carolina, Ohio, Oklahoma, Oregon, Tennessee, Texas, Virginia aser Washington yimtitem nung kenten sentong ayongzüka akatsü.

AO OSHI ANGAZÜKDAK:**TANÜ ANGAZÜKTSÜBA OJANG****Tepen**

(n) temang nung tekanük o tapu na tsüngda (arm)

* Tsümartürtemi teben sünga kisen enoker.

Teperi

(adj) tagishi, tabensa (enough, sufficient)

* Kütsüi chiyongtsü teperi alia bener aru.



Tir Yimym

OLONG PAITEP # 7189

1						2				3
								4		
5		6				7				
8										9
								10		
				11		12				
		13								
14						15				
				16						

TIPLÉN

1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsüngpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7188 TELANGZÜBA**TIPLÉN :**

1. Taa, 3. Teküm, 6. Aibelen,
7. Aut, 9. Ajizük, 10. Ojala, 11. Semer, 13. Sen, 15. Kioktsü,
17. Itsük, 18. Kar.

LANGTSÜNGLEN :

1. Tai, 2. Asensor, 3. Tanü,
4. Kua, 5. Mitsüksü,
6. Azübenshi, 8. Lah, 9. Jangkok,
12. Akok, 14. Nashi, 16. Sür.

NAI-A YA METETTER MA

Oklahoma City Thunder-i Deobarnü NBA Finals game tenetbuba nung 103-91 agi Indiana Pacers koka iba asayamung kokogo. Parnok 2008 küm Seattle nung amenoker asaya tenzükbä sülen tang mezügbuba asayamung ka kokogo. League MVP Shai Gilgeous-Alexander-i iba asaya nunga kanga junga asaya-a point 29 angu aser assist 12 süja liasü. Maneni final nunga pa nem best player naroküm agütsü. Shaquille O'Neal sülen pa ya League MVP aser Finals MVP anguba mezügbuba asayar kümogo.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jeliae-e-mail : tirymym@gmail.com nung yokang mesüra Tir Yimym bureau tem nung agüjang.

Assam nung ano Hindu nunger anema jembir nisung ana apu

Guwahati, Aami/June 23 (Agencies): Kiralongrartemi Pahalgam amakba sülen Hindu nunger anema jembir ana Assam kübok tesem balala nungi puogo, aser ajak senteper ibala mesükba ken o nung aija apur 97 jungogo, ta Chief Minister Himanta Biswa Sarma-i Hombarnü ashi.

X nung sangdong ka ajanga Chief Minister-i ashiba agi, nisung ana rongnung ka Tinsukia nung aser ka Nagaon district nung pua liasü. "Hindu nunger anema inyaktertem maneni puyonga odar. Linük anemer aser Hindu nunger anemer 97 tepuokdaki

yokogo," ta pai zülutsü. Sarma-i ashiba agi, Tinsukia nung apusang yagi Hinduism dak sendakba nung tashishitsü aketba onüktem social media nung lemsatop aser Nagaon nung apusang yagi Lord Ram anema o tamajung post süja liasü.

April 22 nü Jammu and Kashmir kübok Pahalgam tesem kiralongrartemi amakba sülen state ajunga nung Hindu nunger anema jembir aser inyaksangshirtem pua aoba nung iba ya shilem ka liasü.

Toba mapang Pakistan pusema jembiba atema

opposition AIUDF MLA Aminul Islam aija apu. Bail agütsüba sülen pa National Security Act (NSA) kübok sotogo.

May 2 nü taruba panchayat elections atema nüboyimba mapang Chief Minister Sarma-i, Pakistan pusema yimym ayimertem aija liasü.

Pai, kiralongrartem nem tapet temerenshi agütsütsü atema lisopurtem dang Ato Kilonser Narendra Modi aser Indian Army pusemtsü mepeshiba den, shirnoki 'Pakistan Zindabad' ta ayimer parnok tetsüing sükdangtsütsü ta ashi.

Pradyot-i Bangladesh nung pro-India sorkar ka amenokdaksütsü centre ayongzüük

Agartala, Aami/June 23 (Agencies): Tipra Motha Party ngutetsang Pradyot Kishore Debbarman-i kidanger Bangladesh nung yimden yimsüsüba tsütsü temelenshi indang süoki ia bilemba lemsatopogo.

India anemba tashi kari kidanger linük nung sorkar kümtetra timtem asütsü ta bilemba lemsatopba mapang Debbarman-i, "India anemba tashi kari sorkar kümtetra iba ajanga Tripura, Meghalaya, aser Assam dak kongshitsü," ta pai tekümdangtsü metetdaksü.

Paisa, Centre dang Md Yunus-i aniba sorkar nem taoba PM Sheikh Hasina'er party, Awami League taruba election nung toktepdaksütsü atema melatsü asoshi inyaksü ayongzüükogo.

"Tang tashi nungbo ni

angatetba agi Md Yunus-i aniba sorkar yagi Sheikh Hasina election nung metoktepdaksütsü. Awami League metoktepra BNP mesüra tanga fundamentalist tashi kari Bangladesh nung sorkar kümtetsü aser onok arrtsü nung aliba state tem timtemtsü," ta pai ashi.

Paisa, Tripura nung political party tem dang vote bank ama ozüing alema Bangladeshi nungertem memesütsü ayongzüba den, iba amala inyakyim maneni benokra yimden yimsüsüba aser tanga lenla balala nung mepetmsü tulu adoktsü ta ashi.

Social media ajanga live jembiba mapang Debbarman-i, Chakmaghat aser Killa-Bagma na densema Tripura Tribal Areas Autonomous District Council (TTAADC) kübok tesemtem nung ozüing

alema Bangladesh nungertem arua jenoka lir ta ashi.

Paisa, sorkar dang ozüing alema state-i arua alirtem bushiteta meyipa yoktsü atema paramilitary forces nem mapa nongloksütsü ayongzüükogo. Pai, state administration-i iba ken o achaayangba yimya dak temulung masüba lemsatopa liasü.

Mapang talangka nungi yonga ataba Tiprasa Accord indang jembiba mapang Debbarman-i ashiba agi, takaratiba nung jenjang agitsü atema pai Union Home Minister Amit Shah dangi shiti zülüogo ta ashi.

"Home Minister-i kü dang taruba hopta asem tsüngda jenjang agitsü ta tenangzükbä agütsüogo. Menomeyangba ajanga Northeast ajunga nem osang tai agütsür," ta pai shisem.

Manipur nung Anganwadi worker ka tepsetba atema nisung ka apu

Manipur nung Anganwadi worker ka tepsetba atema nisung ka apuba noksa nung angur.

Imphal, Aami/June 23 (Agencies): Deobarnü Imphal East district kübok Keikhu Maning Leikai, nung nisung kati pa kinungtsü, shiba Anganwadi worker ka liasü, la tepsetba sülen police-i iba nisungba ya puogo.

Police-i Hombarnü ashiba agi, parnoki Keikhu Maning Leikai, Imphal East District nungi Md Mujibur Rahman (45), pa kinungtsü Sima Sahani (44) tepsetba atema puogo.

Police sangdong ajanga ashiba agi, nisungba yagi pa

kinungtsü ya Deobar anepdang 12:15 ako nungi 12:30 ako tsüngda tepset asütsü akok.

Osang ajanga ashiba agi, Mujibur Rahman-i Sima Sahani ya pa den mejanga aliba mapang amak.

Ken o ashishitsü atema police-i Mujibur Rahman anir ao. Iba sülen mapang tatsüka lir parnoki pa ya tebuttsü tepsetba atema aitsü aser temzüing ozüing kübok inyakyim balala benoka inyaksü atema judicial custody nung toktsü.

Nüburtemi iba anema ola adokba sülen asülaer tsürapur aliba tesem Khergao nung Deobarnü lokti seden ka ayongzüük aser Sima Sahani tepsetba anema Joint Action Committee ka tenteta liasü.

Senden nung bangzüing asem agizüka liasü. Mezüingbubaji aibelena alir pua merenshitsü, tanabubaji ketdangsürtemi la tepsetba ken o tejangja mongutet tashi tasü mang magitsü aser tasembubaji ketdangsürtemi ghonda 48 tsüngda aibelena ali mepura CSO aser nüburtemi longkak aitsü bangjema liasü.

Kasa mapang nung tetsürtemi Deobarnü Keikhu nung mener longkak ait aser nisung tepsetba ya aija liasü.

Young Star Sporting Union, Keikhu general secretary Md Abdul Halim-i, iba ya kanga tia maka tatalokba ka ta ashiba den, iba ya ajaki aitsütsü ayongzüka liasü. Paisa, bushisüingdang nung police nem teyari agütsütsü aser JAC-i yangluba bangzüing pusemtsü parnok renema lir, ta ashi.

Israel-i ano Iran indang Fordow nuclear site amak

Tehran, Aami/June 23 (Agencies): Hombarnü Israel-i Tehran south tsütsü Iran indang underground Fordow nuclear site nung tanaben amak, ta Iranian state television ajanga ashi.

"Mezüng amaker temi Fordow nuclear site nung ano makogo," ta Qom province nung crisis management authority odongtari Tasnim news agency dang ashi.

Iba tatalokba indang ya Israel Defence Minister Israel Katz-ia mapang tatsüka lir jangjatsü aser par linüki central Tehran nung targets tem tesüiba mapang mongudangi aliba ama sashia amaker ta ashi.

Iba tesem raksatsüba indang osangbo mali. Kasa mapang Tehran north tsütsü ola tulu adoka apokba angashiogo.

Iran nunger indang missile agi amaktsü ta Israel army temi tekum dangtsü ashiba sülen Jerusalem nunga ola tulu adoka apokba angashiogo.

Deobarnü United States-i Iran indang Fordow fuel enrichment plant nung "bunker-buster" bombs tulu amshia amak, koba tenem ka telung nung yanglua lir aser Israel-i hopta ka dak tema amakdang mokongshiteti liasü.

Deobarnü Fordow aser tanabuba target amakdang iba bomb ya 14 amshi, ta Joint Chiefs of Staff chairman Air Force General Dan Caine-i ashi.

Iba bomb ya tsükdaktsütsüba tashi ya US mitkar dak dang lir aser Honibarnü Asia leni B-2 stealth bombers aoba ngua Iran den Israel-i hopta ka dak tali raraba nung US Tir Donald Trump adentsü teimla yua aliba tali jangjatsü.

Fordow ya Iran indang nuclear enrichment facility tanabuba lir aser iba linük indang facility tulua ya Natanz lir.

Fordow ya Natanz dang tilaba aser Tehran southwest

tsütsü kilometre 95 shi pilar Qom yimti anasa tenem ka telung nung yanglua lir.

Iba facility ya 2006 küm yanglu tenzük südi ta amanger aser 2009 nungi mapa minyak tenzük, aser kasa kümji Tehran-i yimjak nung iba facility aliba sangdonga liasü.

Fordow ya long aser ali telung feet 260 shi lur lir ta asadangteta lir aser iba tesem ya Iranian aser Russian surface-to-air missile systems agi kumzüka lir ta ashir. Ajisüaka item air defences ya Israel-i amakdang raksatsür mesük.

Ajisüaka Israel Ato Kilonser Benjamin Netanyahu-i ashiba agi, Iran amakba nükjidong ya par missile aser nuclear sentongtem samatsütsü asoshi lir, koba Israel asoshi timtem aser yangji Fordow ya dena lir.

"Operation ajunga ya Fordow samatsüba sülen renemtsü," ta Israel ambassador to US, Yechiel Leiter-i Hokulbarnü shia liasü.

Netherlands-i ayua aliba sculptures 119 Nigeria nem meyiptsü

Lagos, Aami/June 23 (Agencies): Küm 120 dak tema jakdang colonial era mapang Nigeria nung taoba Benin chuba yimli nungi sculptures 119 auya aliba Netherlands-i meyipa agütsüogo.

Nigeria indang National Commission for Museums nung director-general Olugbile Holloway-i Honibarnü ashiba agi, item tejen oset ya parnoki bener aodak aliba nüburtem indang tanüla aser maitsü lir.

"Onoki alima dang onok timi aser ochishia amshitsü dang asüngdanger," ta pai Lagos nung aliba National Museum nung sentong ka agidang ashi.

Germany-ia iba amala oset

1,000 dak tema meyipa agütsütsü mulungogo, ta Holloway-i ashi.

Item artefacts dang Benin Bronzes ta ajar aser imperialism mapang bener aoba osettem meyipjang ta Western sorkar tem dang ajungshia arudang Africa indang senti puti otsü meyiptsüba ibai tesüsaba alitsü.

Artefacts pezü museum indang courtyard nung yua lir aser museum indang permanent collection nung alitsü aser tanüngba ya Oba of Benin, Ewuare II nem meyipa agütsütsü, shiba southern Nigeria nung Kingdom of Benin indang yimsüsür lir.

Benin Bronzes nungya yin aser ivory sculptures dena lir

aser item ya 16 buba nungi 18 buba century mapang indang lir.

Item oset ya Sir Henry Rawson lenisüba kübok British sepaitemi 1897 küm Benin chuba yimli amakdang auyaba lir aser iba mapang yimsü süa alisang Ovonramwen Nogbaisi ya ita trok bendang lima nung jenoka ali. Benin chuba yimli ya tang southern Nigeria nung liasü.

2022 küm Nigeria-i alima tesem balala nung aliba museums tem dang iba amala oset noklang aika meyiptsütsü mepishia liasü. Kasa küm London nung aliba museum ka nungi oset 72 shi meyiptsü aser United States nung aliba Rhode Island nungi 31 meyipja liasü.

US-i China dang Iran-i Strait of Hormuz shibangba anendaktsütsü ashi

Washington, Aami/June 23 (Agencies): US Secretary of State Marco Rubio-i China dang Iran-i Strait of Hormuz shibangba nungi nokdangtsü ayongzüka liasü, koba alima nung rong asoshi tongtipangtiba lenmang ka lir.

Iba Strait shibangtsü parliament-i agizükogo saka tatembangba telemtetba ya Supreme National Security Council-i agitsü ta Iran sorkar meyong Press TV ajanga ashiba sülen pai iba o ya ashi.

Totzü supply nung timtem agütsüba ajanga rongsenketzüng nung timtem tulu ajurutsü. Talisa China ya alima nung Iran nunger totzü timtiba aliba linük lir asr Tehran den tesendaktep tajung lir.

US-i Iran nunger nuclear sites amakba sülen totzü jenjang tali kumogo.

"Beijing nung aliba China sorkar dang parnok (Iran) dang iba indang ashitsü ajungshir, kechiaser parnok ya par totzü asoshi Straits of Hormuz nung kanga sashia metaloka lir," ta Rubio-i Fox News den Deobarnü sensaksemba mapang ashi.

"Parnoki iba Straits ya shibangra, ibaji parnok asoshi economic suicide ka asütsü. Aser onoki iba nung telangzüba agütsütsü lenmang lir, saka danga linüktemia yangji rangloktsüla. Iba yagi onok dang nungi danga linük indang rongsenketzüng nung tesashiba kongshitsü."

Alima nung totzü shilem 20 shi iba Strait of Hormuz ajanga

aor, aser Middle East nung totzü aser gas producers tulu temi region nungi item oset belenba nung iba tzü lenmang ya amshir.

Strait nung operation nung tetsükdaktsü agütsütsü merangba ajanga alima nung totzü jenjang timba akumtsü.

Hombarnü trading tenzükba mapang totzü jenjang khien aika akum aser Brent indang totzü barrel nung sen \$81.40 akum. Ajisüaka anüngdang tashinung shilem 1.4 shi ajema sen \$78 akum.

Crude oil jenjang yagi gari nung totzü shiokba nungi supermarket nung chiyongtsü jenjang tashinung kongshir.

China ama danga linük katia Iran nungi totzü aika malir, aser taoba ita Iran nungi anogoshi totzü 1.8 million barrels dak tema alia liasü.

Ano Asia nung rongsenketzüng jenjang tajung nung aliba linüktem, talisa India, Japan aser South Korea ya iba Strait alema aoba crude oil nung kanga metaloka alir.

Iran aser Israel tsüngta raraba nung hopta tatemlen US aden aser Washington-i Tehran indang tongtipang nuclear sites tem raksatsüogo, ta Tir Donald Trump-i ashi.

Ajisüaka Iran-ibo Fordow nung teraksa tera dang liasü ta ashir aser UN indang nuclear watchdog-i Fordow ali telung nung aliba nuclear sites raksatsüba masadangteter.

Trump-isa Iran-i nuclear programme mesendokra ano kanga agi tesashiba amaktsü ta tekum dangtsü shiogo.

Russia-i tayimtsü amshia Kyiv amak, nisung 10 tepset

Kyiv, Aami/June 23 (Agencies): Russia-i drone aser missile amshia Ukraine yimtiba, Kyiv aser temeket region tem amakba nung nisung ter tepset, ta ketdangsür temi ashir.

Ketdangsür temi ashiba agi, Hombarnep yimti nung district aika nung nisung aliba tesemtem nung tenük yoker amak. Ibai hopta ka tsüngta ammag agi sangwa kuma kanga sashia amakba tanabuba alitsü, aser ibai Israel-i anünglen nungi Iran amakba nung United States-i shilem agitsü telemtetba agiba ajanga aliba ajunga yangji temulung agütsür aliba meyipdaktsütsü tejangraba nung amak amai ajiteter.

Russia-i yazüng drones aser decous 352, ballistic missiles 11 aser cruise missiles pongu khaloktsü, ta Ukraine indang air force ajanga ashir. Air defences ajanga timba targets metongteti khazüka yok mesüra mapa meinyakteti kumdaktsü, ta sangdong ka ajanga ashi.

"Linük yimtiba nung ano kanga sashia amak. Tsükchir indang drones tzüsem ama aiben

yok," ta Kyiv indang military administration tekolakba Tymur Tkachenko-i sangdong ka nung ashi.

"Nisung aliba tesem nung amaktsüba Russia nunger yimya memelenshi," ta pai Telegram nung ashi.

Ajidang masü, nisung aliba ki, mozüki, saisapongdak tesem aser bomb shelter ama amshiba metro station telungi aiba nung amak, ta emergency services ajanga ashi.

Iba mapang Kyiv indang districts ter nungi trok nung teraksa bener arutsü aser nisung ter yiru, ta Interior Minister Ihor Klymenko-i Telegram nung ashi.

Kyiv kübok Shevchenkivskiy district nung nisung kar tepset, kong ki atongtepa süa aliba entrance ajunga raksatsü. Iba ki teraksa nung tang tashi nung lir," ta Klymenko-i ashi.

Deobar aonung Chernihiv region nung short-range drone ka amshia amakba nung nisung ana tepset aser tanur asem densema nisung ter yiru, ta ketdangsür temi ashir.

(Maneni tapak 8 nung...)

GOVERNMENT OF NAGALAND

DIRECTORATE OF TECHNICAL EDUCATION

NAGALAND : KOHIMA - 797004

NO.DTE/ COUN-IST/ 1/ 2024/

Dt. Kohima, the 23rdJune, 2025.

NOTIFICATION

Pursuant to Govt. Administrative Approval NO.HTE/27-7/2016/343 Dt. 4th April, 2025 and in continuation to this office's Notification dated, 25th April and 12th June, 2025, Interested candidates are invited to attend the counseling to be conducted by the Empaneled Private Universities/Collegesfor the courses given in the table below:
These seats are over and above the Government allotted seats.

Sl. No	Name of the Course(s)	Eligibility	Date, Venue and timing
01	Engineering (Civil, Mechanical, Electrical & Electronics, Computer Sc. and other Engineering allied courses)	12 th Passed with Science (PCM) or Diploma Engg for Lateral entry	Date : 25 th June 2025 Venue : Government Polytechnic Kohima, towards Indira Gandhi Stadium, Kohima
02	Architecture Engineering	12 th Passed with Science (PCM) or Diploma in Architecture Assistantship for Lateral entry	
03	MBBS and Medical Allied courses (BDS, B. Pharm, etc)	12 th Passed with Science (PCB and NEET qualified)	Time : 10:00 AM onwards

(Er. VIPULHOU LHOUNGU)
Director

GOVERNMENT OF NAGALAND

STATE COUNCIL OF EDUCATIONAL RESEARCH AND TRAINING

NAGALAND :: KOHIMA

NOTIFICATION

This is to bring to the attention of all concerned N-TET qualified candidates of the 2013 & 2016 batches that the Department of SCERT will discontinue re-validation of N-TET certificates after Nov. 2025. Therefore, those who wish to apply for re-validation of their N-TET certificates from 2013 or 2016 are notified to do so at the earliest by submitting their professional pass certificate along with original N-TET certificate within the stipulated time.

(KEVIRALE Ü KERHUO)
Director
SCERT, Nagaland, Kohima

Mokokchung nung tanurtem nem fooball tesayuba agütsüdag



Mokokchung nung "Grassroot Football Clinic" Shri.Vesupra Kezo, Senior Superintendent of Police, Mokokchung-i tenzüksür kelen 35+ Mokokchung Football League telok aser tanurtem külemi tangokba noksa.

Mokokchung, Aami/June 23(TYO): Mokokchung nung 35+ Mokokchung Football League teloki ayongzükba "Grassroot Football Clinic" tanü Mojabi Futsal Turf, Salangtem Ward nung Shri.Vesupra Kezo, Senior Superintendent of Police, Mokokchung-i tenzüksüogo.

Iba coaching clinic ya 35+ Mokokchung Football League teloki Mokokchung nung tanurtem football nung jangraa intetdaksütsü mangdang nung arishi küm 9 nungi 14 tashi pur asoshi June 23 nungi June 27 akatsü asoshi ayonga lir, iba coaching clinic nung tesayur mongin Nagaland Super League 2025 Champion Barak FC, Head

Coach Shri. Brando Kamson ajanga tesayuba agütsütsü aser pa den ano MFL nungi Shiponglepba, Rongsennungba, and Tiatoshi nungeri yariteptsü.

Iba Grassroot Football Coaching Clinic nung tanur arishi küm 9 nungi 14 tashi nung tanur ajak agi 125 dendagi, Mokokchung nung Football asaya nung temulung agütsütsü aser iba ya ajanga talisa clinic nung adener tanurtemi parnok sempet angateta parnok taküm nung tajangzük akatsü mangdang nung ayongzuka akar. Tarutsü mapangtem nung Mokokchung nung lanur asayar tajung bushiba mapang nung tang clinic nung adenertem nem

maongka agütsütsü ta 35+ Mokokchung Football League telokisa metetdaksü.

Iba sentong tenzüksü kelen Shri.Vesupra Kezo, Senior Superintendent of Police, Mokokchung-i mapang tatsüka agia jembidang Football asaya nung takok khonang tulu ngutetertemji tang ama lanur asüadang nungi asaya jangraa asayaretm nungi adokba aser akümba tesa lir ta ashi.

Paisa tsürabur aser tanurtem dang tang angazüka ainba mapang nung aremzüka angazüktsüla, arishi küm ainba yaririji tesayuba balala agütsütsü aser yangji tangazükba balala ngua aintsü, ta ashi.

Pre Subroto Cup Cluster- 1 asayamung tenzükogo



Dimapur, Aami/June 23 (TYO): Nagaland Football Association den longjemer Department of Youth Resources & Sports-i Pre Subroto Cup Cluster- 1, asayamung ayongzükogo, koba Chumoukedima Football Stadium nung June 23 nü tenzükogo aser June 26 tashi asayatsü.

Sentong nung o jembiba mapang District Sports Officer, Chumoukedima, Wutsutho-i, Dimapur indang District Youth Resources Officer, Nagaland Football Association tatong tir, Dimapur District Football Association tir, Department of Youth Resources and Sports nungi coach tem, Area Sports Association tir, media fraternity, school ajak nungi teachers in-charge, Chumoukedima District Football Referee Association aser tsürapurtem shirnoksa State-level Pre-Subroto Football Tournament Cluster-1 nung shilem agitsü aser reprangtsü atema aru, parnok ajak dang

kanga pelaba lemastep.

Wutsutho-i iba asayamung indang tatsü agi metetdaksü aser ashiba agi, taküm department-i Cluster 1 aser Cluster 2 ta ayongzuka asayar ta ashi. Cluster 1 ya Chumoukedima Football Stadium nung aser Cluster 2 ya Indira Gandhi Stadium, Kohima nung asayatsü.

Clusters ana nung ajak senteper school 28-i shilem agitsü, kong U- 15 boys atema school 17 aser U- 17 girls atema school teku alitsü.

Chumoukedima nung school 12-i shilem agidar, kong U-15 (Boys) atema school 10 aser U -17 (Girls) school anati shilem agidar.

Paisa, Cluster One nung U- 15 boys asaya nung team tajungtiba ana Cluster Two nung Indira Gandhi Stadium, Kohima nung June 30 nü nungi tokteptsü. Tebur asaya nung tajungtiba ana aser tetsür asaya nung tajungtiba dang shimtsü.

July 1 nü IG Stadium nung shilem agitsü atema school ka shimtsü. Ajak senteper asaya 12 asayatsü.

Wutsutho-i tarutsü nung professional football asayar akümtsü jangraratem dang iba asayamung ya süoki ia aitsü ajungshi, kechiyong parnok küm ishika dang lirbo senior team nungi asayatsü.

District Sports Officer-isa, state level nung takok anguba team anaprongla New Delhi nung August ita tanga state aser union territories nungi team tem den asayatsü ta metetdaksü.

Sentong ya N. Viniekhohie (DYRO) lenisüba nung agi Khriezotunuo Theunuo (Sports Coach)-i sarasadema liasü. Kevicasier Savino, PIS-i achaayanga tenangzüktepba agia liasü.

Hombarnü mezügbuba asaya Bethel Baptist School, Niuland aser Christian School, Molvom (U-15 Boys) na asaya liasü.

Manipur tsür Linthoi-i Berlin Junior European Cup 2025 nung gold angu

Aami/June 23, 2025

(Agencies): Manipur nungi Linthoi Chanambam-i otsü tasen ka yanglua, la ya India nunger judo asayartem rongnungi Berlin Junior European Cup 2025 nung gold medal ka anguba mezügbuba asayar kümogo.

Arishi küm 18 tain Manipur tsür la yagi tetsür 63kg category nung gold medal ngua liasü. La Inspire Institute of Sport (IIS) tenüng nungi asaya liasü.

Berlin nung iba asayamung nung linük 37 nungi asayar 618-i shilem agi aser iba ajanga iba asayamung ya Europe nung junior judo asayamung tongtibangtiba kümdaksü. Linthoi-i international asayar aika akokba sülen final nung top-seeded Polish tsür ka koka liasü.

Iba asayamung nung gold medal anguba ajanga Linthoi career tajungba küma aoba sayur. Lai 2022 küm Sarajevo nung Cadet World Championship asayaba mapang 57kg category nung takok ngur liasü. Lai 63kg category nunga takok tajung anguba ajanga elite-level judo asayar ka küma aoba sayur.

"Iba takok ya kü atema ajak lir," ta Linthoi-i medal anguba sülen ashiba den, la indang coach aser lar kibongi la nongita



yariba atema kanga pelaba lemsatapa liasü.

Linthoi-i taoba mapang 2022 Asian Cadet and Junior Championships (Bangkok) nung gold medal angu, 2018 Sub-Junior Nationals nung title aben aser 2021 Senior Nationals, Chandigarh nung takok ngur aliba den tang gold medal anguba ya bendenlokogo.

La 2017 küm nungi Inspire Institute of Sport nung Georgia nunger coach Mamuka Kizilashvili tawabangba kübok training agidar.

Linthoi ya arishi küm ti asüba mapang nungi Mayang Imphal, Manipur nung judo asaya liasü. La IIS nung training agiba ajanga international jenjang nung takok tajung nguteta odor, aser iba asaya nung la India nunger rongnungi asayar tajungtiba ka kümdar.

BENDANGLI OSANG : Tapak 7 nungi...

Russia-i tayimtsü amshia Kyiv amak...

Ano Kyiv nungi southwest tsütsü kilometre 85 shi pilar Bila Tserkva yimti nung yasüng amakdang nisung ka tepset aser ti yiru.

Ukraine Tir Volodymyr Zelenskyy-i ashiba agi, preliminary data ajanga Russian sepaitemi Kyiv amakba nung North Korean missiles amshiba sayur.

Pai Russia, North Korea aser Iran dang parnok tesendaktep maneni lira tetsübo tali prokshitsü ta ashi.

Moscow indang mitkar temi Hombarnü nikongdang ashiba agi, yasüng Kyiv region nung "military-industrial complex enterprises" nung tenük yoker amak.

Russia-i February 2022 nung tenzükba rara nung linük anaprongi civilian dak tenük meyoker ta ashir, saka iba rara nung civilian meyirijang aika süogo aser itemji timba Ukraine nunger lir.

Russia-i Kyiv nung tesashitiba amakba ya taoba hopta liasü, aser iba mapang parnoki drones noklang aika

khalokja nisung 28 tepset aser 150 dak tema yiru, aser iba mapang tesem 30 jungnüa amak, ta Ukraine ketdangsür temi ashir.

Ukraine indang commander-in-chief Oleksandr Syrskii-i Russia nung tali amaktsü nangzükogo.

"Onok defence kija nung mena mekazütsü. Kechiaser iba yagi tajung kecha bener marutsü aser tatem nung asenok ainshitsü, nüburtem aser alinük samatsü," ta pai ashi.

Anungji Ukraine-i Russian military targets nung amakba tali akumtsü, ta paisa ashi.

Deobarnü Russian sepaitemi Ukraine anema drones 47 yok aser missiles asem khaloktsü, ta Ukrainian air force ajanga ashir.

US Tir Donald Trump-i yimjung tezüngzüktep ka mulungtepa agizüktsü ajungshia aruba raksaja Moscow yagi asaa tashi ajak amshia amakba mapang atsülangtsü aser alinük tali rakzüktsü meranger, ta Kyiv-i aitsür.

BILEMDANGANG

"Anema aliba ama kecha jangradem mali."